

RIJEČ

GRAČANIČKI GLASNIK
časopis za kulturnu
historiju

Broj 48, godina XXIV
novembar, 2019.
[str. 207-208]

© Monos 2019

Sedam pjesama

Amra Mujezinović

Zujanje muhe na mojoj sahrani

Kroz staklo uprljano njenom utrobom
Časak posmatrah plavetnilo neba.
Lopatica u ruci me opomenu da je
Prenešem na vječno počivalište.
Na lopatici od daske i čaršafa
Prestah zujati i ja.
Lepet rasplesanih krila potvrdi:
Gotovo je.
Vjetar prenese cerek potomaka:
Ko se zadnji smije, najslade se smije.

Početak braka

Dok on mirno tone u san,
svjestan da je najbolju igračku
prenio preko kućnog praga,
ona budna sanja dan
kad će prestati kostima mjeriti
i na mesu ovjeravati
razdaljinu između vrata i zida
dok traži taster za svjetlo.

Bubamara

Od svih nestašnih bića,
bubamara se udavi
u mojoj čaši pića.

Zlatni dukati na dlanu

žigosa me taj zlatni dukat na dlanu,
podera mi suknju,
zašilji potpetice,
suzi pogled
i pljunu mi u lice.

Morska

Divim se njenom bronzanom tenu
Smještenom na stolici s pogledom
Na morski život
Miješa tijesto i moli jaje u njemu
Da se ne pokvari
Dok neko u njemu
Ili u njoj
Ili njoj
Ne otkrije čari ljeta

Bronzana medalja

Nakon toliko godina
Uhvatila je ritam sa smrću
Sad marširaju kao vojnici
Nakon toliko godina
Kad se umori od marširanja
Ispusti dah i odloži srce
Ispod njegove slike na zidu
I bronzane medalje
Za život uloženi u našu domovinu.

Lubenica

Ti uporno riječima kuckaš po mojoj glavi
Kao ja prstima po lubenici
I osluškujesh kakva sam
Iako
Za procjenu
Nemaš pojma
Šta trebaš čuti.